

լինելու մի յաջողակ միջնորդ՝ լուսաւոր աշխարհների կրթութիւնը Ասիայում տարածելու: «Մենք մօտեցանք Ասիային մեր միսիոնարներով ու աւետարանով, — ասաց Նա, — եւ դրանով աւելի զայրացրինք Նրանց, որովհետեւ կրօնական աւանդապահութիւնը, դարերի ընթացքում, խիստ խորին արմատներ է ձգել Նրանց մէջ: Մենք դիպանք Նրանց հոգու եւ զգացմունքների ամենափափուկ լարերին եւ դրանով զգուսնք յարուցինք Նրանց մէջ՝ թէ դէպի մեզ, եւ թէ դէպի այն լոյսը, որ տարածել էինք ուզում: Մենք մեր միսիոնարների ձեռքով կատարեցինք մի վատ ծառայութիւն՝ ուրիշի տան մէջ երկպառակութիւն ձգեցինք: Փորձենք ձեռք մեկնել Ասիային ճշմարիտ գիտութեան եւ լուսաւորութեան առաքելներով, այն ժամանակ, ես հաւատացած եմ, որ Նրանք կը սիրեն մեզ: Թո՛ղ տանք կրօնի գործը իրանց: Ասիան, կրօնքների հեղինակը, գիտէ իր համար Նոր կրօնքներ ստեղծել, եթէ այդ պէտք է Նրան: Նա վերջացրեց իր դասախօսութիւնը այդ խօսքերով. «ասիան տոեց մեզ գիտութեան նախագիտելիքները եւ ինքը ծերացաւ անշարժութեան մէջ: Մենք Նրա յառաջադէմ աշակերտներն ենք: Երախտագիտութիւնը պահանջում է, որ մենք տոկոսներով վերադարձնենք մեր ծերունի վարժապետին մեր ստացածը, որպէսզի Նա դարձեալ մանկանայ Նոր աշխոյժով եւ Նոր կեանքով: Եւ ես այդ նպատակով բերեցի խորին Ասիայից այդ մանուկներին, որ այժմ զարդարում են իմ ամբիոնի շուրջը... Խուռն ծափահարութիւն թնդացրեց ընդարձակ դահլիճը: Այդ միջոցին հանդիսականներից չորս հոգի մօտեցան դասախօսին, սեղմեցին Նրա ձեռքը, առաջարկելով, թէ իրանցից իւրաքանչիւրը կը ցանկանար մեզանից մեկին որդեգրել եւ իր հաշոյով ուսում տալ: Ինձ վեր առեց մի այրի կին: Կարօյին վեր առեց մի կալոածատեր. Սագօյին վեր առեք մի գործարանատեր, իսկ Ռափայելին, այդպէս էր հնդկացի պատանիի անունը, վերառեց մի արհեստաւոր:

— Մենք բաժանուեցանք, բայց կիրակի եւ տօն օրերին տեսնում էինք միմեանց հետ: Իմ բարերարուհին յայտնուեցաւ մի շատ բարեպաշտ եւ առաքինի կին: Նա ամուսնից բաւական մեծ ժառանգութիւն էր ստացել, եւ այդ ժառանգութիւնը պէտք է մնար Նրա երկու աղջիկներին, որոնցից մեկը տասնեոտեց տարեկան էր, իսկ միւսը տասնեութ տարեկան: Նրա աղջիկները մօր քնքուշ սիրտն էին կրում: Բարեպաշտ կինը ամէն հնար գործ էր դնում, որ ես հայրենիքի կարօտութիւն չզգամ, որ միշտ ուրախ լինեմ: Նրա գուրջ աւելի եղաւ դէպի ինձ, երբ իմացաւ, որ ես մի որբ տղայ եմ, երեխայութիւնից զրկուած եմ եղել իմ ծնողներից: Մի օր ամբողջ քաղաքը որոնել էր Նա եւ վերջապէս գտել էր մի զմիւռնացի հայ ընտանիք: Այդ ընտանիքի հետ ծանօթացաւ Նա, ինդրում էր միշտ իր տունը յաճախել, միայն ինձ հաճեցնելու հա-